

## 第二部

### 成長

Tùi 1830 年代起，阮 ê 家族 tòh 一直 teh 經營農場，所以我知影阮 tiòh 用真 chē 工夫來維持農場 ê 經營，甚至用 koh khah chē 工夫來增加產量 kah 利純。若是土地肥 koh 雨量可靠，這 tòh 會加 khah 容易；基礎若 phah 好，成長 kah 改良 tòh 有可能。土地 kah 靈魂 ê 耕作確實 lóng 全款是 án-ne。

使徒彼得迫切要求咱「Tiòh óa 靠咱 ê 救主耶穌基督 ê 恩典，來 hō 咱對祂 ê 認 bat 繼續進步。」(彼得後書 3：18)。M̄-koh，啥物款 ê 工作會牽涉 tiòh 培育 kah 擴充咱基督徒 siōng 充實 ê 生活？咱必須 tiòh 做啥物 leh？

Ti chit 部分，咱 beh 探討全心全意獻身基督 ê 機會，聽上帝 ê 話 koh hō 上帝歡喜 ê 渴望，祈禱 kah 教會 ê 作用，tiā<sup>n</sup>-tiā<sup>n</sup> hông bē 記得 ê 品德—感恩，赦免 ê 重要地位，服從 ê 需要，kah 通過聖神來成就一切 ê 權柄。人類 kah 屬靈成長 ê 發生並 m̄ 是通過被動 ê 過程，卻是主動 ê，咱 beh 來思考 án 怎 hō 它實現。

對咱來講，這 kám 是有親像一個真奇妙 koh 有挑戰性 ê 事項 leh？是 ā，本來 tòh 是 án-ne！M̄-koh，上帝並 m̄ 是 kan-ta<sup>n</sup> 用祂 ê chéng 頭 á kí 一大堆 khang-khòe，koh 對咱講：「Tòh 是這。Chit-má 去做！」上主顛倒是因為疼 kah 慈悲，kah 咱形成一個合作關係，來「通過聖神賜 lín 氣力，hō lín 心內 ê

活命勇壯起來。我 mā 求基督，tùi lín ê

信來 tòh tī lín ê 心內，hō lín ê 疼心 ē-tàng 釘根來落實，hō lín ē-tàng 得 tiòh 氣力，koh hō lín kah 上帝所有 ê 子民 lóng 明白基督 ê 疼是 gōa-nih 長、闊、高、深。願 lín ē-tàng 體驗基督 hit 款超越智識所 ē-tàng 理解 ê 疼，hō 上帝 ê 完善 kā lín 完全充滿。」(以弗所書 3：16-19)。